## GA PRONONCEE

DEVANT LE ROY, SEANT EN SES ESTATS generaulx à Bloys, par Reuerend pere en Dieu, Messe Pier RE D'EPINAC, Archeuesque, Comte Lyon, Primardes Gaules, au nom de l'Estat Ecclesiastique de France.



A PARIS.

Chez Iamet Mettayer Imprimeur du Roy.

.Pierre l'Huillier Libraire iuré.

1 5 8 8.

AVEC PRIVILEGE DV ROY.

Transfer to - % 7 - 7 . د و ره Carledon Carle Company 



## HARANGVE PRONONCEE

DEVANT LE ROY, SEANT EN SES Estats generaulx à Blois, par Reuerend pere en Dieu, messire Pierre d'Epinac, Archeuesque, Comte de Lyon, Primat des Gaules, au nom de l'Estat Ecclesiastique de France.



IRE, encores que la Frãce, qui a esté insques icy agitée par les plus grandes & perilleuses tempestes, qui ayent iamais trauaillé autre Republi-

que, ne soit pas encores du tout hors des vagues & orages: si est-ce qu'elle pense desia veoir de loin le port, & se persuade d'arriuer bien tost en lieu de seureté, puis que toutes choses luy tédent ayde & promettent secours. Car premieremet Dieu qui auoit estendu sur nous la main de son iuste courroux, nous ostant le sentiment de nos maux, & le sens pour y pourueoir,

semble maintenant nous regarder de son œil de pitié, puis qu'il nous prepare de si grands conseils, & vne si parfaicte vnion, pour arrester le cours commun de nos miseres. Et apres ceste asseurace que nous auons eu de Dieu, la prudence qui est en vous plus grande que vostre aage ne permet, la dexterité de vostre esprit, qui se recognoist en toutes vos actios, & a esté remarquée en ceste eloquente proposition, qui a raui tout le monde en admiration, & vostre saincte & bonne volonté & pieté enuers vostre peuple, nous donnent esperance d'vne felicité prochaine. Et ceste expectation est grandement confirmée, quand nous consideros que vostre sainct desir est si affectueusement secondé par le conseil de la Royne vostre mere, qui ayat si bié merité de tout le Royaume de Fráce, tant pour le soin qu'elle a eu de faire si sainctement & religieusement instituer les ans de vostre premiere ieunesse, que par sa sage conduite, par laquelle elle a manié le gouvernail de ceste Monarchie, pendant le temps des plus dangereuses tempestes, continue encores maintenant à vouloir par sa prudence s'ayder à re-

mettre vostre Royaume en son ancien honneur. Et nous promet encores beaucoup de bien l'assistance & valeur de Moseigneur vostre frere, que nous esperons debuoir estre le bras dextre de vostre authorité & puissance. Et auec toutes ces choses vos treshumbles subiects, qui par les calamitez souffertes par le passé, sembloiet auoir perdu le courage, recognoifsans la faueur que le ciel leur presente maintenant, reueillent leurs esprits ja come endormis & assoupis, & apportent vn bon zele & affection à la restauration de cest estat: de sorte qu'il semble que toutes ces choses ioinctes ensemble, nous facent desia veoir le ciel plus serain, & nous promettent vne heureuse tranquillité.

Et comment est-ce que nous ne serions tous en ceste expectatió de bonheur, puis qu'il plaist à vostre Majesté, non comme Roy, mais comme pere tresbenin, traitter si gracieusement auec vos subiects, leur donner ceste honneste liberté de vous dire leurs plaintes & dolcances, & faire vne si amiable communication & conference auec eux, pour trouver les moyens de leur donner quelque asseuré repos apres tat

A iij

de malheurs? En quoy certes ils cognoifsent combien est grande vostre sagesse & prouidence, qui a sceutresbien recognoistre, que vous ne pouviez rabiller les desordres qui estoient en vostre Royaume, que premierement vous ne les eussiez bié & amplement entendus: & ne les pouuiez mieux entendre que par la bouche de vostre peuple, qui luy mesmes en sent les pertes & les douleurs, Car à la verité l'vne des plus grandes incommoditez qui accopagnent l'estat Royal, est que le Prince ne peut entendre les dessauts qui sont en son estat, que par la bouche de ceux qui sont autour de ses oreilles. Et iceulx luy estans bien souuent dissimulez il ne peut, bien qu'il en eust bonne volonté, les reparer, pour contenter son peuple. Chose qui despleut tellemét à l'Empereur Diocletian, que voyant que ses Conseillers luy cachoient la verité des fautes qui estoient en son Empire, luy ostant par là tout moyé de les reigler, come il en auoit bonne volonté: il se despita tellement, que pour ceste raison principale il remit & resigna son Empire entre les mains de Constantius Chorus: & ayma mieux viure en personne priuée, & dresser son iardin à Solone, que de garder l'Empire du monde auec ceste incommodité, de ne pouvoir sidelemet recognoistre les maux ausquels il appartient à vn Empereur & Prince souverain de pourveoir.

Mais vostre Majesté, SIRE, a bien prins yn conseil beaucoup plus honorable, vtil & salutaire: car appellat tout son peuple, quia senty toutes ces calamitez & ruines, & leur donnant toute liberté de dire ce qui le greue, riene luy pourra estre caché. Et cognoissant particulieremet quelles sont toutes les maladies qui affligent tous les membres de ceste Republique, il pourra aussi auec eux y trouuer des conuenables remedes. Et tout ainsi comme ils recognoissent que vo exercez en leur endroict l'office, non seulement d'vn iuste & equitable Prince, mais encores d'vn bon & pitoyable pere: ainsi ils ne doiuent desirer rien plus que de donner par effect tesmoignage de l'obeissance, à laquelle les oblige, & la nature qui les a faict naistre vos subiects, & l'amitie paternelle qu'il vous plaist leur porter.

Et parce, Sire, vos treshumbles &

tres-obeyssans seruiteurs & subiects, les gens Ecclesiastiques de vostre Royaume, recognoissans que ceste vnion de l'obeissance du subiect, auec le commandement du Prince, est vne liaison qui entretient en estre & en grandeur ce grand corps comun de la Republique, qui vient si tost à decheoir, que ce lien est dissolu & rompu, vous protestent deuant vostre Majesté, qu'ils n'ont rien de plus cher,ny n'ont apporté, apres l'honneur de Dieu, autre but & fin à leurs actions & discours en ceste commune & publique assemblée, sinon que de tenter tous les moyens qui pourront estre pour rédre vostre Majesté aussi aimée & obeye de ses subiects, crainte & redoubtée de ses ennemis, comme ont esté les Roys vos predecesseurs, & comme vos vertus le meritent. Car nous sçauons affez, & l'experience nous en a (malheureux que nous sommes) trop fait sentir le dommage, que la desobeissance est l'affoiblissement de toute puissance, la ruine des maisons & familles, la perte des villes, seigneuries, & Royaumes. Et si iamais la terre a porté des Geans, qui, comme a creu l'ancienneté fabuleuse, ont assailli les

cieux

cieux, & conspiré contre la Majesté diuine: il semble bien que ce ayent esté ceux, qui rompans le lien commun des loix par leur desobeyssance & impieté, ont consondu, desordonné, & renuersé sans dessus dessoubs toutes choses.

Vostre Majesté donques, SIRE, acceptera maintenant, s'il luy plaist, ce public tesmoignage que nous vous donons d'yne tres-humble obeyssance & fidele seruitude, de laquelle nous preténdons né nous departir iamais. Et puis qu'il vous plaist, pour ouurir le chemin à vne bone restauration devostre estat, nous donner la liberté de remostrer les choses quinous greuent: nous estimerions faire grad tort au debuoir que nous auons à Dieu, à vostre seruice, au bien & vtilité de nostre patrie, à l'expectation de ceux qui nous ont enuoyez, & à ceste singuliere & bone volonté que vous auez enuers nous, si palliant les affaires nous vous dissimulions nos maulx, nos pertes, & nos calamitez. Car puis que par les loix ciuiles celuy est tenu coulpable de crime de leze Majesté, qui ayant entendu quelque entreprinse ou conspiration au dommage du Prince,

ne la reuele, ne serions nous pas iustemet reputez pour traistres, si estans appellez soubs l'auctorité de vostre Majesté, pour luy declairer les causes du mal commun: nous vous cachions ou dissimulions la verité des choses qui meritent reglemet? Et encores que le vieil Prouerbe, nous soit assez cogneu, que le complaire acquiert des amis, & la verité, apporte haine: si est-ce que nous estimons au cotraire, que la verité soubstenue par l'auctorité de vostre Majesté, aura tant d'efficace, qu'elle sera prinse en bonne part de chacun, puis qu'elle sera approuuée de vous. Aussi, Sire, seroit-ce chose qui seroit mal-seante à nous, & contraire à nostre vacation, si nous attachions (comme dit le Prophete) des oreilliers foubs les coudes de ceux qui faillent, & mettions des coussins & cheuets soubs la teste des pecheurs, pour seduire les ames & les entretenir en leur vice. Et puis que le patiét ne peut estre bien guary s'il ne declaire bien apertement les causes de son mal, nous vous descouurirons nos playes, nous dirons les symptomes qui nous arrivent, & ne celerons les douleurs que nous sentos,

attendant en nostre mal, secours de vous, comme de nostre medecin souverain. Et observerons toutes fois en ceste nostre liberté tout le respect que nous devons à vostre Majesté, & la modestie qui se doit attendre & esperer de telles ges que nous sommes.

Il y a trois choses qui maintiennent l'estat de toutes les Republiques, & de l'exacte observation, desquelles dependleur heur & felicité: comme au contraire leur corruption est vn presage euident & manifeste de leur prochaine ruine. La premiere est la religion, la seconde la police, tant ciuile que militaire: & la troissesme les finaces publiques. Et par ce ayat traitté les poincts generaux qui appartiennét à ces trois, & remettat ce qui sera de particulier au cayer de nos remonstrances, il semblera que nous aurons iette yn ferme fondement, pour ce qui merite reformation en l'estat de ceste Monarchie, qui a esté desreiglée en tous ces ordres, par la licé ce que le malheur du temps a apporté, soubs la longueur des intestines guerres & partialitez ciuiles.

l'ay mis la religion en premier lieu,

Bij

pource que le premier accord des peuples laissans la vie barbare & rustique pour s'assembler en la societé ciuile, a esté d'auoir vn lieu de religion pour les contenir ensemble. De sorte que, comme dit Plutarque, si nous recherchons curieusement toutes les contrées du monde, & la memoire de toutes les anciennes & modernes Republiques, nous trouuerons bien que quelques vnes se sot passées de Roys, les autres de loix, les autres de lettres, de murailles, des maisons & richesses, & ainsi de toutes autres choses, qui semblent estre necessaires à vne communauté politique: mais il ne s'en trouuera iamais aucune, qui n'aye eu vne certaine religion pour honnorer Dieu. Et seroit dit-il, plus aisé de bastir une ville sans fons ou sans terre, que d'assembler vn peuple sans religion. Et pource voyons nous, que tous les anciens legislateurs, encores qu'ils fussent Idolatres, ont commencé leurs institutions & ordonnances par vn tel quel honneur de Dieu, & ceremonie exterieure de la religion: comme Deucalion aux Grecs, Lycurgue aux Lacedemoniens, Yon & Solon aux Atheniens, Romulus

& Numa, aux Romains. Et briefen toutes les Seigneuries du monde, le premier fondement de l'estat de la societé ciuile, a esté vne religion inuiolablement obseruée. Et de là vient que tous ceux qui se sont meslez du maniement des affaires publics, n'ont iamais rié tant craint, qu'vn desordre en leur religion, ou quelque nouueauté en icelle. Cognoissant bien que la religion (qui est celle qui retirent la societé publique, & est le fondement de toutes les loix) ne pouvoit estre troublée ou changée, que par vne sinistre consequence, elle n'apportast vn grand changement & redoutable perturbation en tout l'estat. Et non sans cause ce grand Orateur Romain disoit, qu'estant la religion alterée, il s'en ensuyuoit necessairement la perte de la fidelité entre les hommes, & vne confusion desordonnée de la vie ciuile. Dequoy nous trouuerons afsez d'exemples en toutes les Republiques bien instituees. Et si nous voulons rechercher combien les Atheniens, qui ont esté celebres entre tous les autres Grecs, pour leur sage gouuernement, ont eu chere la conseruation de leur religion, le seul exé-

B iij

ple de Socrates nous fera veoir en quel horreur ils auoient l'introduction d'vne nouuelle religion. Car ses ennemis, qui ne cherchoyent sinon que calomnieusement le faire mourir, ne peurent trouuer vn crime plus detestable, ny par lequel ils le peussent rendre plus odieux, que l'acculant qu'il introduisoit vne autre religion, que celle que les Atheniens auoiét de tout temps obseruée. Comme aussi nous voyons que Xenophon & Platon, defendans sa cause, se sont plus arrestez à le purger de ceste accusation, que de nulle aultre, qui luy fut imposée. Et lsocrates, Orateur renommé entre les Grecs, escriuant l'institution d'vn Prince, l'exhorte de ne changer la religion de ses predecesseurs, pour les troubles & remuemens qui en peuuent aduenir. Et dés le premier establissement de la Republique Romaine, entre les premieres loix de Romulus, ceste icy en estoit vne, Deos peregrinos ne colunto. Et Numa second Roy, voulant reigler la religion des Romains, crea des Potifes, afin, comme dit Tite Liue, qu'ils eussent l'œil, qu'il ne se troublast quelque chose en leur droict diuin, par l'introdu-

ction de nouvelles & estrangieres ceremonies, au mespris de la religion ancienne. Et apres que Auguste sut demeuré vainqueur de tout l'Empire Romain, voulant consulter auec ses particuliers amys, des moyens de la reformation de la Republique, fut conseillé par Meccenas celebre Senateur, de ne permettre iamais aucun changement en la religion, comme estant cela vn moyen fort propre pour introduire choses nouuelles & troubler vn estat. Assez d'autres pareils exemples se pourroient trouuer en l'ancienneté, lesquels i'obmettray, pour ne perdre d'auãtage de temps en chose si claire. Mais si les anciens idolatres incertains de ce que ils debuoiet croire, & n'ayans autre cognoifsance de Dieu, que celle que la nature parmy les tenebres & obscuritez de la raison humaine, leur faisoit veoir, sans aucune scintille ou lumiere de la diuine grace, ont esté si soigneux & opiniastremet curieux, de maintenir leur religion absurde & ridicule: combien à plus forte raison nous Chrestiens, qui auons la certitude de nostre creance par l'inspiration du sainet Esprit, par la propre bouche de Dieu, par la presence humaine de son cher Fils, par la doctrine de sa parolle, par les miracles de sa vie, par sa mort & passion, par le sang de tant de martyrs, par le sçauoir de tant de doctes personnages, & par la successió continuelle de l'Eglise, combien dis-ie, debuons nous estre affectionnez à soustenir ceste nostre religion, de laquelle nous auons tant d'asseurez & suffisans tesmoignages? Combien debuős nous defendre ardemment ceste foy que nous-auons approuuée de si long temps: & combié debuons nous auoir en horreur de veoir vn autre croiance de Dieu, que celle, par laquelle nous sommes appellez à I E s v s-CHRIST, regenerez par son Baptesme, & nourris & alliez auecques luy par ses Saincts Sacremens ? Car si ceste resolutio de conseruer inuiolable la religion, a esté commune à toutes les nations du mode, combien est elle plus propre & plus particuliere à nous Chrestiens, qui ne retenons pas nostre religion seulement pour la conseruatió de ceste societé ciuile, mais en attendons selon nos œuures & actions vne certaine & eternelle apres ceste vie? Et auons tant d'asseurance de nostre soy,

& sommes enseignez par icelle, que si vn Ange du ciel venoit pour nous insinuer vne aultre doctrine, que celle que nous receuons par la tradition Apostolique, que nous ne luy prestions aucune foy ou. audience. Qu'il nous vienne en memoire ce qui est commandé si exactement en la loy de Dieu, que si nostre frere, nostre fils, nostreami, & celuy que nous aymos come nous mesmes, voire nostre propre féme, nous yeult attirer à vne religion aultre que celle du Dieu viuant, que nous ne l'escoutions point, mais soyons seueres & rigoureux à les chastier. Comme donques assemblez en la societé ciuile nous debuons maintenir premierement nostre religion:mais comme Chrestiens nous y auons vn debuoir plus particulier, tant pour l'asseurance que nous en auons, que par le commandement exprez sorty de la bouche de Dieu. Mais auec tout cela, comebons & naturels François, nous y auons vn autre debuoir qui nous y astraint oultre ces precedentes obligations.

La France a esté celle, qui depuis auoir receu publiquement la foy Chrestienne soubs Clouis, l'a tousiours gardée & im-

muable & inuiolable d'vn mesme cours. La France n'a iamais admis dedans son sein, les peruerses opinions de la foy. La France, tadis que tout le reste de la Chrestienté estoit agitée, par les pernicieuses diuisions detant de diuerses sortes d'heresies, qui ont regné iusques à maintenat, a tousiours demeuré vnie & constante, sans se laisser aller à aucune faulse doctrine. La France a esté le secours & la defense de la foy Chrestienne, & la terreur des ennemis d'icelle. La France en somme a tousiours esté comme vn rocher ou fort înexpugnable de la Chrestienté. Et combien seroit-elle descheuë maintenant de son ancien honneur, combien auroit-elle perdu de sa reputation, combien maqueroit elle de sa premiere fidelité enuers Dieu, si changeant sa fermeté & constance au fait de la foy, elle viuoit longuemet ainsi diuisée, & enduroit deuant ses yeux iadis si ialoux de l'vnion de la croyance Chrestienne, vne liberté, mais plustost licence intolerable de viure sous diuerses religions? Et pource, SIRE, vos tres-humbles & tres-obeissans subjects, les gens de l'ordre Ecclesiastique, estiment que vostre Maiesté prendra en bonne part, suyuant le zele & affection singuliere qu'elle a tousiours monstré enuers la foy Catholique, ceste tres-humble requeste qu'ils. vous font, de vouloir maintenir vn seul exercice de religion en vostre Royaume, en chassant promptement tous Ministres qui en enseignent vn autre, que celle que vous sçauez estre la vraye, Catholique, Apostolique, & Romaine. En quoy ils ne doubtet point que vostre Maiesté ne soit disposée d'vn sainct & tres-chrestien desir, veu que l'honneur de Dieu, qui vous est si cher, & qui a esté si licentieusement par le passé foulé aux pieds en ce Royaume, vous y incite: & que la charité que vous auez enuers ce peuple, comis soubs vostre Empire, & que vous aimez tant, vous y appelle, & que la reputation & estime de vous & de vostre couronne iadis si florissante, vous y pousse assez ardemment. Carvostre Majesté recherchant la memoire des choses passées, recongnoistra assez, que tant que la France a esté vnie soubs vne mesme religion Chrestienne, elle a faict voler sa gloire & renomée par toutes les contrées du monde; elle a

faict sentir la valeur de ses armes par tous les coins de la terre: elle a tousiours esté victorieuse sur tous les ennemys de la religion catholique, & a fait tant d'actes heroïques & d'heureuses conquestes cotre les infidelles, qu'elle c'est acquise vne telle gloire entre les Asiens, Affricains, Indiens, Perses, Tartares, Mores, Sarrazins, & autres, que tous les Chrestiens qui sont en l'Europe, sont par eux nommez François. Car pour n'auoir ces nations estrangieres senty les armes d'autres Chresties, que des François, ils ont aussi comprins soubs le nom honnorable de Frace & des François, toute la Chrestienté Latine.

Mais depuis que la France a esté diuisée & deschirée en deux diuerses religions, voyons combien elle a perdu de son ancienne renommée. Celle qui commandoit à vne grande partie de l'Europe, qui conquestoit les Royaumes loingtains, & qui faisoit de son seul nom trembler les nations les plus belliqueuses, s'est veue depuis ceste malheureuse & infortunée diuision reduitte à telle extremité, qu'au milieu de son sein, elle à receu les armes estrangieres: elle a quasi pris la loy de ses

voisins & de ses ennemis: & cruelle, tournant son glaiue cotre ses propres entrailles, bien qu'elle sut inuincible à toutes les autres nations, s'est abatue, vincue, & ruinée elle mesme. Et cela est le fruict qu'à produit ceste venimeuse plante de nouuelle opinion, qui semble bien estre proche de pousser encores des reiettons plus dangereux, si suyuant l'expectation que vostre peuple obeissant conçoit de vostre prudence & pieté, il ne vous plaist d'y

pourueoir promptement.

Souuienne vous, SIRE, que vous portez en main le sceptre de ce grand Roy Clouis, qui premier regla ceste Monarchie soubs la profession publique de ceste religion, laquelle est maintenant remise en doubte en ce Royaume. Souuienne vous que vous estes successeur de ce grand Childeberg, qui ne pouuant patir à l'entour de soy ceux qui sentoient mal de la religion Chrestienne, entreprint la guerre contre les Visigots, qui s'estoient laissez infecter de l'heresse Arrienne, & en fin les contraignit de reuenir en l'vnió de l'Eglise saincte & Catholique. Souuiéne vous que vous portez sur la teste la

couronne de ce Charles, qui pour la grandeur & valeur de ces faits à merité le surnom de Grand, & par la vertu de ses armes auança la religion Chrestienne, & defendit l'auctorité du sainct siege Apostolic contre ceux qui le persecutoient. Souuienne vous que vous tenez la place de ce celebre Philippe Auguste, qui auec tant de zele & affection, employa ses armes contre les Albigeois heretiques, qui s'estoient sequestrez de l'vnion Catholique. Souuienne vous que vous seez au siege de ce tant renommé sainct Loys, lequel n'espargna ces moyens, ses forces, & sa propre personne, pour la desence & propagation de la foy de Iesus-Christ, & par ses Chrestiennes actions, merita la couronne & surnom de Sainct. Et sans m'amuser d'auatage à les racompter tous, souuienne vous que vous estes petit fils de ce grand Roys François, lumiere de la pieté de France, fils de ce victorieux Héry, la memoire duquel viura eternellement, & frere de ces deux catholiques Princes, Fraçois secod, & Charles neufielme, à qui Dieu face paix. Mais encores qui vous touche de plus prés, souuienne vous, SIRE, souuienne vous que vous estes ce renommé Henry, qui estant encores Duc d'Anjou, & frere de Roy, auez eu la desense de l'Eglise, fait de si valeureux actes, gaigné tant de grandes batailles, & tant de fois dompté les ennemis de la foy Catholique, que vous auez remply toute la Chrestienté des merueilles de vostrenom victorieux. Et nous pensons bien, SIRE, que vostre Majesté n'a point si tost mis en oubly, ce grand & solemnel serment qu'elle à faict à son Sacre, non seulement de maintenir la Religió Chrestienne & Catholique, mais encores de l'auancer à son pouuoir, sans en tolerer aucune autre. Et si iamais aucun serment a peu obliger vn Prince à maintenir & garder sa foy, cestuy-cy vous astraint si estroittement à la defense de ceste religió, que vous ne pouuez en endurer aucune autre, sans faire force à vostre consciéce, & mettre paraduéture en doute le droict que vous auez à la Couronne. Car vous sçauez bien que vous auez stipulé & contracté auec Iesus-Christ, que vous acceptiez le septre à ceste condition, d'estre defenseur de sa religion Catholique: voi-

re qu'en ce solemnel iurement vous auez pris pour erre & pour gage son precieux corps & son precieux sang. Et manquant maintenant à ceste foy si religieusement iurée, ne pensez vous point qu'il doiue s'irriter à l'encontre de vous? ne cognoissez vous point, que tous les maulx que nous auons enduré, prennent leur origine de son iuste courroux? Et ne voyezvous pas, que vous ayat donné ce sceptre auecques telles conditions, il vous menace de le vous arracher des mains, si vous ne luy tenez ceste promesse que vous luy auez faicte si solemnellemet? Et tout ainsi comme Dieu vous semond à l'obseruation de la foy que vous luy auez donnée; vos subiects par icelle mesme vous coniurent à leur garder les conditions, auec lesquelles vous estes fait leur Roy: & que vous ne pouuez enfraindre, rompant vostre jurement, que vous ne perdiez aussi le tiltre que vous portez de treschrestien. Et nous ne faisons point de doubte, que remettant ces choses deuant vos yeux, que reueillant la memoire de vos predecesseurs, & continuant vostre premiere prudéce & vertu, vous n'ayez ce bonheur de

de voir en vos iours tout vostre peuple reduit en la bergerie de l'Eglise saincte & catholique, de laquelle vous estes comme

pere & protecteur.

Par ce moyen ces grands Roys de Ierusalem Dauid, Salomon, Abia, Iosaphat, Ezechias, Iosias, se sont acquis la benediction de Dieu, & vn succez fauorable en tous leurs affaires, pour auoir auecques tant de diligence remis la pureté de la religio, & restauré le seruice divin qui estoit depraué. Et nous esperons aussi, que suyuant leurs traces & vestiges, vous reunireztoute la France en la religion Catholique. Et pour la recompense de vostre sainct desir, aurez ceste benediction de Dieu, de voir en vos iours vostre Royaume aussi florissant qu'il fut onques. Et come cela sera fort agreable deuant Dieu, aussi sera-il grandement honnorable à vous & à vostre Couronne. Ce que vous cognoistrez assez, si vous considerez, qu'il n'y a auiourd'huyRoy, Prince, Potétat ou Republique (i'en excepte quelques peuples Barbares & le Turc, les detestables mœurs & coustumes duquel nous doiuer estre si odieuses, que le seul nom nous en

doit faire horreur) qui permette à ses subiects de viure en autre religion, que celle que le Magistrat par la décission de l'Eglise, tient pour seule, bonne & vnique. Et ne sont certes dignes d'estre entédus ceux qui veulent tellement restraindre la puissance du Prince ou du Magistrat, qu'il ne puisse contraindre ses subiects à la foy, mais les doiuent laisser viure en liberté (comme ils disent) de conscience. Car ceste opinion a tousiours esté condemnée & reprouuée generallement de tous les Chrestiens, sinon par les Manicheens & Donatistes, qui desendoient, qu'il ne falloit presser personne pour sa religion, mais laisser chacun en sa liberté & fantafie. Et ceux la mesmes auiourd'huy qui arrachent de vous comme par force ceste liberté de leur religion, ne la permettent aux autres. Car és lieux de la Chrestienté où Dieu à permis qu'ils soiet les maistres, & ayent la puissance en la main, tant s'en faut qu'ils accordet à ceux qui sot Catholiques de viure librement en leur religió: qu'au cotraire les sectes diuerses qui sont entr'eux(car desia ils sot bedez, & diuisez, signe euident de leur prochaine ruine) ne

se peuvent copatir l'vne l'autre, Et là où le Caluiniste est le maistre, le Lutherien n'ose viure libremer: voire mesme que quad ils changent de Magistrats de diverses opinions, la religion change suyuant sa volonte: comme l'on a veu assez de ces mutatios en Angleterre, & en beaucoup de lieux en Allemagne. Et quoy, seroit-ce pas vne honte & vergoigne trop grande au bon Chrestien & fidele Catholique, s'il estoit moins affectionné à sa religion, qui est approuuée par vne si longue & continuelle succession, que ces nouveaux Chrestiens à leurs opinions si recentes, qui sont nées comme en vne nuict? C'est donc vne maxime generalement certaine & approuuée de l'Eglise par toutes les Republiques, que le Magistrat doit & peut contenir son peuple sous vne mesme foy:comme il se monstre assez par tant de belles loix & constitutions des Chresties & Catholiques Empereurs, comme Cóstantin, Teodoze, Valentinian, Martian, & d'autres, & tant de belles ordonnances establies par les Roys predecesseurs.

Mais parce que non seulemet ceux qui se sont sequestrez & desunis de la bergerie del'Eglise, ont abusé & reduit beaucoup de peuples, soubs le pretexte de la corruprion qui estoit entre les Ecclesiastiques, & des abus qui sont coullez parmy eux: mais encores ceux qui sont demeurez soubs l'obeyssance de la foy catholique, deplorent infiniement le desordre qu'ils y congnoissent. Nous dirons & confesserons librement auec eulx, que nous n'en portons point moins de regret, voire en sentons vn desplaisir incroyable: mais nous adiousterons bien aussi, que la licece de nos malheurs passez a beaucoup deterioré le mal, & empesché iusques icy le sain& desir que les gens de bien ont eu, de restaurer la discipline Ecclesiastique, & faire vne reformation generale de tout ce qui estoit corrompu en icelle. Et auec ceste commodité que les Ecclesiastiques ont eue en ceste assemblée de conferer ensemble, ils esperent soubs vostre auctorité executer vne reformation si canonique, que Dieu en demeurera loué, vostre Majesté contente, & vostre peuple satisfaict. Et pour leur en donner le moyen, ils vous supplient treshumblement vouloir faire publier & au-

&oriser en vostre Royaume, suyuant la priere qu'ils vous en font plus particuliere par leurs remonstrances, le sain & sacré Concile de Trente, lequel par l'aduis de tant de doctes personnages, a exactement recherché tout ce qui est necessaire pour remettre l'aglise en sa premiere splédeur. En quoy, SIR B, ils esperent & attédent de vous, comme d'vn Roy tres-chrestien & tres-affectioné à l'Eglise de Dieu, l'assistance de vostre auctorité, pour l'execution de ceste reformation. Et pource que le premier poin& en est, que l'Eglise soit pourueue de bons & diligés Pasteurs, & qui par la vertu de leur doctrine & exemple de leur pieté & integrité, puissent redresser ce qui est tombé, rasseurer ce qui est esbranlé, & esclairer ce qui est obscurcy : ceux de l'ordre Ecclesiastique vous supplient tres-humblement, qu'il vous plaise remetrre l'ancienne forme & maniere de l'election aux Prelatures de l'Eglife, suiuant les saincts Canons & Decrets. Qui sera le moyen pour faire, que la porte pour entrer aux Prelatures Ecclesiastiques, ne soit plus comme elle a esté iusques icy, si apertement quuerte à la fa-

ueur, ambition, & symonie, que lon a veu y regner, auec vne silence si effrenée, que le commerce & trafic en estoit pareil, & pire paraduenture, que des biens temporels mesmes. Ce qui a procedé de ce que la pluspart des biens destinez pour le seruice de Dieu, sont tenus & principalemet occupez ou manifestement par personnes laiz & non Ecclesiastiques, ou indirectement par certains confidens, qui ne sont gueres differens d'eux, au grand scandale & preiudice de la religion & Eglise Catholique. Nous lisons aux histoires Françoises, que du temps de Loys sixiesme, furnommé le Gros, les gentils-hommes s'estoient donnez telle liberté, qu'ils occupoient non seulement partie des biens Ecclesiastiques, come le Comte de Clermont les biens de cest Euesché, le Seignr de Roussy les terres de l'Eglise de Rheims & de Laon, le Seigneur de Meung, celles de l'Euesché d'Orleans. Mais encores s'attribuoient le tiltre des Prelatures, comme le Seigneur de Beaujeu, l'Abbaye de Sauigny en Lyonnois, & d'autres l'Abbaye de sainct Denys en France. Mais ce bon Roy ne pouuant endurer ce desordre en l'Eglise, print les armes contr'eux; & vertueusement les contraignit de remettre les Eglises en leurs biens, libertez & franchises, cognoissant bien que ceste confusion traineroit apres soy vne infinité d'autres desbordemes en l'Eglise. Ainsi esperons-nous, Sire, que suyuant l'exéple de ce bon Roy vostre predecesseur, vostre Majesté laissera les Prelatures de l'Eglise, & leur election entre les mains des personnes de ceste vacatio: & empeschera que les laiz ne les possedent & detiennent en tout ou en partie, directemét ou indirectement. Et pour cest effect reuoquera dés à present tous dons, promesses,& reserves, vraye corruption detoute la discipline de l'Eglise.

Et si nous auons ce bon heur, lequel tout vostre peuple attend de vostre pieté, que les dignitez Ecclesiastiques soient distribuées selon l'integrité de la vie, & la sincerité de la doctrine: nous ne faisons point de doute de veoir en brief l'effect d'vne salutaire reformation. Comme au contraire sans cela il seroit impossible de faire aucun bon sondement pour restablir la discipline Ecclesiastique. Et sçaus

toutesfois, que de là seul depend le principal moyen de la reunion de tous vos subiects, soubs l'obeissance de la religion Catholique. Car quand les Prelats residas en leurs charges, & vueillans sur leurs troupeaux (& tels seront-ils quand par la vertu ils auront esté appellez & esseuz) auront l'œil à faire cathechiser la ieunesse, & instruire les ignorans, & leur declaireront les approbations & raisons des sainctes ordonnances de l'Eglise: il n'y a point de doubte, qu'en bien peu de teps nous n'en voyos vn tel fruict, que les Catholiques les embrasserot beaucoup plus deuotieusement: & les desuoyez admirás la sagesse & prudence de l'Eglise saincte, guidée en tout & par tout par le sain & Esprit, se reduiront peu à peu soubs son obeissance. Et par tels moyés les plus grádes & dangereuses heresies ont esté plus que par les armes, extirpées & estaintes. Et par l'effect de ceste saincte reformatio, soubs vostre auctorité, nous esperons de voir en brief ceste pernicieuse erreur, qui a troublé tout ce Royaume, s'en aller & s'euanouir en vapeur & fumée.

Mais nous auons iusques icy assez amplement

33

plement parlé de ce qui appartient à la generalité du fait de la Religió, qui est le premier fondement de l'estat. Remettant doncques les poincts particuliers à ce qui est porté par le cayer de nos remonstrances, nous discourrons vn peu de la police, qui est le second poinct que nous auons promis & proposé de traitter. Ce que no ferons le plus briesuement qu'il nous sera possible, & d'autant plus hardiment que nous voyons, qu'auec tant d'attention, il plaist à vostre Majesté nous entendre.

Tous ceux qui ont escrit de l'institutió politique, ont estimé que la tranquillité comune & le repos public, estoit l'vn des buts & sins principaux de la societé ciuille. Come à la verité les Seigneuries vnies ont prosperé & sleury: & discordantes, elles ont esté malheureusement deschirées. Et pource disent les Philosophes, que le premier office d'vn Roy, est de maintenir ses subiects en concorde. Et en cela, Sirf, auec tant d'autres vertus qui reluisent en vous, nous cognoissons cobien vous exercez l'office d'vn bon & equitable Roy, ayant sait veoir cy deuant à chacun, encores que vous soyez de vo-

stre nature belliqueux, combien vous estes desireux de la paix, que vous auez si cherement acheptée. Et recherchát maintenant auec vos sideles subiects les plus seurs moyens pour conseruer en repos vostre Royaume, qui semble en auoir bo besoin.

Il y a tantost quatorze ou quinze ans que nous auons veu faire la guerre inhumaine & cruelle les vns aux autres, gens de mesme nation, de mesmes prouinces, de mesmes citez, pere contre fils, frere cotre frere, parent contre parent: tous subiects d'vn mesme Roy, honnorans mesmes armes & enseignes de fleurs de lis. Et toutesfois nous sommes si aueuglez, que nous ne recognoissons point que lesus-Christ, qui est la verité mesme, & qui iamais ne peut mentir, nous a asseuré, que tout Royaume diuisé en soy sera desolé. Et qui est-ce qui ne voit & ne sent desia le fleau de ceste desolation? Nos champs au parauant fertiles sont laissez en friche, les superbes & riches maisons demeurent desertes & abandonnées, les villes iadis celebres & opulentes restent desolées, par la perte de tous leurs anciens ornemens

35

des edifices tant priuez que publics: & qui pis est, les prouinces sont distraittes & come cantonnées par vne discorde trespernicieuse. Saluste historien tresrenommé, predict long temps au parauant, que la ruine de Rome n'aduiendroit jamais, que par vne diuision entre les citoyens d'icelle. Puis qu'il est ainsi, dit il, que toutes choses qui ont commencement prendrot aussi fin, lors que la ruine de la Republique Romaine approchera, les citoyens combattront contre les citoyens: Car autrement tout le mode ensemble ne pourroit esbranler cest Empire. Et certes sa preuoyance ne fut point vaine, car ceste Seigneurie qui auoit fleury par la bonne intelligence qui estoit entre les citoyés, se perdit & ruina par les divisions d'yn Sylla, Marius, Cæsar, Pompée, Antonius, Lepidus, & Auguste: lesquels, au danger de leur partie, suyuoient la vengeace de leurs factions & haines particulieres. Et non seulement l'Empire Romain, par semblables partialitez sest veu descheoir de sa premiere grandeur, mais encores toutes les plus fortes Republiques du monde, par semblables divisions ont esté misera-

E ij

blement ruinées. L'Empire d'Alexandre, le plus grand qui eust point esté, s'esuanouit comme vn seu d'estoupe par la diuision & desordre qui fut entre ses successeurs. Les villes de la Grece, qui autremét estoient inuincibles, par leur mauuaise intelligence vindrent sous le pouuoir, partie des Macedoniens, & partie des Perses. La Gaule tant de fois assaillie par les Romains, ne peust estre subiuguée, que par le moyen de la division que Cæsar y trouua, de la commodité de laquelle il se seruit pour sa conqueste. L'Empire de Constantinople par les partialitez des Princes est venu soubs le pouuoir tyrannic & miserable d'vn Ethnic & barbare Turc. Ces exéples ioincts auec ceste belle preuoyáce de Saluste, ne nous font-ils pas voir à l'œil, que si nous n'y remedions, ce beau & florissant Royaume, autres fois agrandy par la concorde & obeyssance de nos ancestres, est prest de tober en vne grande desolation & misere par nos factions & partialitez ? Et qui pis est, nous ne nous contézons pas de desmeller nos querelles nous-mesmes, mais encores l'on va iusques en Angleterre & Allemaigne cher37

cher les armes estrangieres, voulant, ce semble, leur dresser vn chemin pour nous mettre soubs leur miserable seruitude. Et ne consideros pas que la calamité la plus notable qu'il soit iamais aduenue aux Republiques diuisées, a esté quand les citoyens partiaux, ont appellé les estrangiers à leur ayde, qui souuent ayans retenu ce chemin, s'en sont puis apres faicts les maistres.

Lors que la Gaule estoit encores diuisée en diuerses Seigneuries, les Sequanois appellerent les Germains à leur secours, & par leur ayde destruisirent quasi ceste belle ville des Autumnois. Mais la victoire fut plus pernicieuse aux vainqueurs qu'aux vaincus. Car ils furent contraints de bailler quasi la moitié de leurs terres aux Germains, qui les auoient secourus: lesquels à la logue chasserent tous les originaires du pays, & se firent seigneurs quasi de toute la Gaule. L'Empire Romain ne receut iamais tant de dommage, que par les Lombards, qui furent premierement attirez par Narses pour chasser les Gots hors d'Italie. Et depuis ayas esté rappellez par luy mesme, pour le mescon-

E iij

tentement qu'il auoit des iniures qu'il auoit receuës de l'Imperatrice Sophie, mirent en proye & pillage toute l'Italie: si bien qu'il fallut de rechef faire venir les François, lesquels ayans retenu le chemin, y ont fait depuis comme les autres, de grandes & heureuses conquestes.

Mais pourquoy cherchons nous des exemples estrangiers, veu que nous en auons de domestiques? Les seditions & guerres d'Orleans & de Bourgogne nous appellerent les Anglois en Frace, qui par ce moyen prindrent si grand pied, qu'ils en possederent longuement apres vne grande partie. Les François donques, qui pour fortisser leur part, inuitét les estrangiers, ne semble-il pas qu'ils cherchent le chemin le plus court, pour perdre leur pays, par les mesmes moyens qui ont ruiné les estats des plus florissantes Republiques? Tels sont doques nos maulx, telles sont nos miseres.

Mais voyons maintenant s'il y auroit point de moyen pour arrester ce cours continuel de nos malheurs. Plutarque, en son liure des maniemens des affaires publiques, amene à ce propos vne belle sen-

tence, & qui semble donner vn fort bon enseignement. Quand, dit-il, le seu se met en vne ville, le plus souuent il ne commence pas par vn temple, par vn palais, ou par autre public, mais se couue & se recele dans le recoin de quelque maison priuée, & de là se glisant & coulat bien auant dans la ville, la gaste & difforme, auec vn dommage irreparable. Aussi, dit-il, il aduient souvent que les seditions ne prennent pas leur commencement des negoces publiques, mais par les offences particulieres de quelques personnes notables, qui se fortifias de quelques factios & pars en la Republique, esbranlent bien souuent tout l'estat. Et il cosirme cela par l'exemple de deux grandes seditions aduenues en Delphes & en Siracuze, pour de bien legieres contentions entre quelques particuliers: & toutes fois de si petite cause, sortit vne grande ruine en ces deux villes. Et si nous recherchos les exemples modernes de cela, nous trouuons que du temps de l'empereur Iustinia, pour maintenir des couleurs de bleu & de verd seulement, ils s'esmeut une telle sedition en la ville de Constantinople entre quelques

gens partiaux, qu'il y mourut en vn iour plus de tréte mil hommes. Et l'Empereur mesme fut en grand danger de perdre & son Empire & sa vie. Et ceste grande faction di bianchi, co di neri, qui a tenu la Republique de Florence en vne grande sedition, & qui l'espandit depuis par toute l'Italie, commença par vne bien legiere occasion entre les personnes priuées. Et partant semble estre fort bon le coseil de Plutarque, qui entre les grads preceptes qu'il donne à celuy qui gouverne vn estat, l'admoneste principallemet de ne laisser croi-Are les contentions entre les grads, mais de chercher tous les moyens pour les estaindre dés le commencement, & euiter que par la consequence elles ne menent apres soy quelque sinistre euenement.

Nous ne voulons pas dire que les querelles particulieres ayent esté la cause de nos maulx, & origine de nos calamitez: mais si voyos nous bien que les inimitiez & factions particulieres, ont longuement entretenu nostre malheur. Et s'il n'y eust point eu de pars en ce Royaume, les timultueux n'eussent si long temps entretenu les troubles qui nous affligent.

Le plus grand bien doncques que vostre Majeste sçauroit faire à vostre Royaume pour tenir la paix en son pays, & so peuple en repos, sera de recognoistre toutes les inimitiez, factions & mescontentements qui y sont, & chercher les moyens de les composer, non en apparence seulement, mais par quelque bon effect, contétant ceux, si instement il se peut, qui se disent mal contens donnant asseurance à ceux qui se disent auoir cause de desiance, & reconciliant ceux qui se tiennent pour ennemis. Et semblera estre fort à propos de prendre l'exemple des anciens Atheniens, qui apres leurs longues inimitiez & seditions, pour chercher vn repos, firent vne loy, qu'ils appeller et d'amnestie, c'est à dire, d'oubliance : par laquelle ils abolissoient entierement la memoire de toutes les pertes, calamitez, & iniures passees Laquelle encores voulurent imiter les Romains, par le conseil de Ciceron, apres les guerres ciuiles. Et sembleroit maintenant fort à propos de la pratiquer, effaçant le souuenir de tout ce qui s'est passé contentieusement entre nous, auec vne abolitio generale de routes les choses qui sont sor-

F

ties de nos guerres ciuiles, pour n'en estre iamais rien recherché, non plus que si iamais elles n'estoient aduenues. Et cela cofir mer en ceste presente assemblée, pour estre chosea iamais inuiolable. Et puis ayant ainsi doucement ordonné pour le passé, vostre Majesté sera treshumblemet supplice de faire pour l'aduenir, vne loy generale du consentement des estats, & qui aura mesme auctorité que la Salique: par laquelle sera deffédu tresexpressémét à toutes sortes & manieres de ges, de dresser aucunes pars, associatios, ou ligues, de traitter des affaires du Royaume auec les estrangiers, les soliciter de venir en Frace, ou faire leuée de gens, soient estrangiers, soient François, sans le consentement & exprés commandemet de vostre Majesté. Et que toutes personnes qui directement ou indirectement auront cotreuenu à ladicte ordonnance, soiet tenus pour rebelles, ennemys du pays, & perturbateurs de l'estat: que leurs biens soient inseparablement ioints & whis à la couronne, & eux incepables de toutes dignitez & honeurs. Car puisque & le mal que nous auos senty jusques à maintenant, nous monstre combien de dommage ont apporté telles ligues & factions, & que l'exemple de tat de republiques ruinées par séblables partialitez, & par l'introduction des armes estrangieres, nous menacent d'une pareille & prochaine ruine: vos treshumbles, trefobeisflans, & tressideles subiets, s'aydéront de tout leur pouuoir pour vo' faire obeir, tant en ce poinct, qu'en tout ce qui aura esté par vous arresté en ceste tant belle & notable assemblée. Et s'il y a quelques gés si temeraires qui s'osent opposer à vos ordonnances, Dieu premièrement combattra pour vous en si iuste querelle, & vos treshumbles subiects vous y assisteront.

La tranquilité donques publique, l'vnio de vos subiets, la reconciliation de toutes inimitiez, l'oubly de toutes les choses passées, l'abolissement de toutes factions tat ciuiles qu'estrangieres, soient le premier fondement de la police, sans lequél nous n'estimos rien pouvoir estre ferme & stable. Le reste consistera en bonnes & saincetes loix, & iustes, & seucres Magistrats. Et de l'vn & de l'autre nous parlerons en termes generaux, remettant les poincts & articles particulieres à ces cayers de nostre

remonstrance. Et pour dire des loix premierement: si iamais Royaume Chrestien s'est peu donner louange d'estre heureux en bones institutions & ordonnances, la France plusque nul autre peult estre glorieuse de ceste belle louange. Car si nous regardons & la premiere & ancienne institution de son estat, & son succez & progrez, nous trouuerons qu'elle ne cede en cela à quelque autre Monarchie. Ce que nous pouuons juger tất par ce qu'il n'y a point aucun qui puisse appartenir à la conseruatio commune, ou aux faicts particuliers concernás chacun, à quoy il ne se trouue que les Roys par leur sage conseil, n'ayét prudemment ordonné: comme d'autant que quasitoutes les nations nos voisines ont emprunté & desrobé de nous la pluspart de leurs loix & meilleures ordonnances. Et est bien à considerer la sorte & la maniere de laquelle sont coposees nos loix, qui est beaucoup meilleure, plus douce & gratieuse que celle de laquelle ont vse to? les Roys, Princes & Potentats de la terre. Car il semble que le peuple François aye seul suiui le precepte ciuil & Politique de

45

ce grand Philosophe Platon, qui vouloit que les loix par vne douce persuasson incitassent plustost les subiects, que de les contraindre par simples & seueres commandemens. Et lisons toutes les loix anciennes des Perses, Atheniens, Lacedemoniens, Romains, & autres, & fueilletos les modernes encores, & nous verrons que tous leurs legislateurs se sout seulement contentez d'ordonner telles & telles choses absoluement, & sans aucune raison, ou persuasion de leurs ordomnances. Mais les Roys de France, qui commandent à leurs subiects comme les peres à leurs enfans, en leurs institutios semblét plustost vouloir instruire par viues raisons & douces remonstrances leurs peuples, que de les contraindre par la force de l'obeissance. Car par les exordes & preambules, ils declarent les causes & les raisons qui les ont esmeus d'ordonner ainsi, afin que leurs subiects se rédent plus obeyssans pour l'amour de la vertu, & de la raison, qui est le fondemét principal de la loy. Et si en toutes les plus grandes louanges, dont les anciens ont celebré Antonius Pius, Prince bon entre les bons, ceste-cy en est vne,

F iij

qu'il n'a iamais rien ordonné, qu'il n'aye tasché de saire trouuer bo par lettres particulieres, par lesquelles il rendoit raison de ses ordonnances. Combien doit estre pour ceste mesme cause honnorée entre nous la memoire de nos bos, iustes & gracieux Roys, qui tous d'vn communaccord ont obserué ceste coustume, qui a esté comme singuliere à ce seul Prince tant recommandé par l'antiquité? Or puisque auec vne si belle maniere nous trouuons que les ordonnances & loix de Frace, ont suffisamment pour ueu à toutes les choses necessaires à la conseruation d'vn estat, l'observation de ces anciennes loix, à laquelle nous ramenos toutes choses, semble estre beaucoup plus profitable & vtile, que d'en chercher ou composer de nouuelles. Carnous sommes enseignez qu'il n'y a rien de plus pernicieux à vne Republique, qu'vne trop grande multitude de loix. Et tout ainsi comme quand vne personne est griefuemet malade, il est reduit à vn tresmauuais party, s'il a affaire à vn vn medecin indocte& imperit, qui redoublat medecines sur medecines, corrompt & altere les humeurs par ceste imprudente varieté. Ainsi deuons nous croire qu'en vn estat troublé, la multitude de loix sur loix, n'est guieres moins dangereuse, que la multirude de medicamens dans vn estomac debilité. Et puis que la retormation n'est rien autre chose, que leuant les nouuelles introductions & abus, reduire les choses en leur premiere & ancienne forme: auec bon droit & iuste occasion nous auons par nos remonstrances plustost rappelle l'viage & l'observation des vieilles loix, que nous n'auons esté curieux d'en chercher de nouuelles. Mais parce qu'elles ne seruent de rien, si elles ne sont seuerement & rigoureusement obseruées, l'vne des principales requestes, que nous auons à faire à vostre Majesté sur ce poinct, sera qu'il luy plaise se rendre seuere en l'observation & entretenement de telles ordonnances. Chose que nous nous promertons de sa iustice, pour l'asseurance qu'il luy a pleu nous en donner en ceste eloquente propositio, qu'il luy a pleu nous faire en l'ouuerture de ses estats, soubs la parolle & ferment de prince: lequel nous vous supplions tres-humblement audir tousiours

deuant les yeux, pour en faire vne defense contre ceux, qui par importunité voudroient vous forcer de les transgresser & enfraindre. Car il n'y a rie qui aye iamais tant fait sleurir les Republiques, que la constante observation des loix du pays. Et le premier signe que lon peult auoir de la perte d'vn estat, est quand l'on voit vne licence effrence & facilité de dispéser des bonnes ordonnances. En quoy certes est digne d'estre notée vne belle sentence de Ciceron apartenant à ce propos, laquelle pour y estre fort propre ie reciteray, traduite de mot à mot. Les Republiques, dir-il, qui sont prestes de se perdre, estant toutes choses deplorées, tombent en ceste fin malheureuse, que ceux que les loix codamnent son restituez, & les iugemens donnez se voyent rescindez: & quad telles choses aduiennent, personne n'ignore que leur ruine ne soit proche, & aucun ne se peult donner esperance de salut.

Vostre Majesté donques, Sire, euitera la ruine de vostre estat, quand elle se rendra non seulement difficile; mais encores inexorable en l'observation des ordonnances si solemnellement faictes, & gar-

dera

dera vne egalité en l'obseruatio d'icelles, sans acception de personnes, puis qu'elles sont faictes pour les grads & pour les petits, pour les riches & pour les pauures. Car c'est vne chose de tresmauuais & trespernitieux exemple quand les loix font rendues, comme disoit ce sage Grec, semblables aux tissus ou toilles d'iraignée, à trauers desquelles les oiseaux passent aisément, & les seules mousches foibles & imbecilles y demeurent prinses & retenues. Soient doques vos loix inuiolables, seueremet obseruées, non subjectes à dispense, non fauorables aux grands, mais communes & egales à chacun. Cela s'obseruera bien heureusement quand vostre peuple sera pourueu de bons Magistrats, qui iugeans sans faueur, sans corruption, sans difference du grand auec le petit, tiénent la balance iustement suspendue. Car les bones loix ne sont pas seulement inutiles, s'il n'y a de iustes Magistrats pour les faire obseruer: mais encores aduient-il quelquesfois, que les meilleures ordonnances du mode par le vice des officiers, tournent au dommage de la Republique. Et pource le premier soin que doit auoir

G

vn Prince, qui comme vous desire l'heur & la felicité de la societé publique, est qu'elle soit aornée de grands & prudens officiers, qui rigoureusement entretiennent le lien de la Republique par la seuerité de leurs iugemens. Et c'est certes vne chose admirable de veoir cobien la France a esté par toute la Chrestiété celebrée & renommée, pour ceste insigne equité qui estoit obseruée par ses anciens Manistrate.

gistrats.

Il se trouuera peu de Republiques, ou anciennes ou modernes, qui se puissent donner ceste louange, comme la France, que les Princes estrangiers se soient volotairement soubmis pour leurs differens à ses Iuges & Magistrats. Car nous lisons que l'Empereur Federic submit au iugement du Roy de France & de son Parlement, la decision de plusieurs differes & controuerses qu'il auoit auec le Pape Innocent quatriesme. Et du temps de Philippe le Bel, le Comte de Namur subit volontairement iugement soubs le Roy & son Parlement, encores qu'il eust pour partie Charles de Valois frere du Roy, tantilauoit de confience en l'equité de

tels iuges. Et de mesme Philippe Prince de Tarente, bien qu'estrangier, accepta volontiers pour iuge le Roy de France seant en son Parlement, sur le differend qu'il auoit auec le Duc de Bourgongne, pour certains fraiz qu'il conuenoit faire pour le recouurémét de l'Empire de Costantinople. De mesme fist le Duc de Lorraine, sur le procez qu'il auoit cotre Guy de Chastillon son beau frere, pour leurspartages. De mesme encores firet le Dauphin de Viennois, & le Comte de Sauoye sur le differend de la foy & hommage du Marquisat de Saluce. Et en l'an mil quatre cens & deux, les Roys de Castille & de Portugal, enuoyerent par aucus Cheualiers Espagnols, vn traitté & accord fait & passé entr'eux, pour le faire publier & emologuer en la Cour de Parlement de Paris, pour auoir plus d'authorité. Facent donc tant de compte qu'ils voudrot les ancies Grecs & Romains de leurs iustes iugemens, de la reputation de leurs loix, de la renommée de leurs Magistrats, sine trouuerront-ils pourtant aucun tesmoignage si celebre pour leur gloire, come sont ceux icy, par lesquels la Iustice

Françoise a esté generalement, & par le consentement de toutes les nations du

monde grandement honnorée.

Mais, bon Dieu, considerons combien elle est decheue de ceste ancienne opinio & reputation, veu que nostre pratique de procez generalement odieuse à chacun, est maintenant tenue plus pour chiquanerie que pour equité, plus pour corruptió que pour integrité, plus pour venditió que pour iustice, plus pour faueur que pour droicture. Ie ne veux pas dire qu'il ne se trouue auiourd'huy vn bon nombre de iustes & equitables Magistrats, qui ennemis de tels desordres souhaittét & desirent ceste mesme reformation de la Iustice, la quelle tous les gens de bien vous demandent & requierent si instamment, SIRE. Mais iene sçay si nous oserons dire que la plus grand part la meilleure surmonte, au moins dirons nous bien que la forme de laquelle les officiers ont depuis quelque temps en çà esté appellez à leur charge, est si pernicieuse, que lon la peut dire la mere de toute corruption & iniustice. Car c'est chose toute manifeste & aperte, que pour créer vn iuge lon n'examine pas la capacité de son sçauoir, lon ne juge pas l'integrité de sa vie, lon ne met point en auant sa longue experience, lon n'a point de respect à l'aage & à la vertu, mais seulemet on regarde si les escus sont de poix. Et depuis que telles gens ont vne sois sinancé, encores qu'ils soient trouuez incapables, si est-ce qu'ils impetrent tant de lettres de iussions, tant de commandement iteratifs, que lon est contraint de les receuoir tels qu'ils sont, au prejudice de

toute la Republique.

Les Philosophes ont estimé, que celuy qui ambitieusement recherchoit d'auoir quelque charge en la Republique par ceste seule pratique, se rendoit indigne d'obtenir iamais Magistrat, estant par là suspect, que plustost vn proussit particulier & auarice l'y poussoit, qu'vn desir de bien faire à sa patrie. Et la mesme opinion auoit Alexandre Seuere, Empereur tresiuste, qui tenoit telles gens dangereux en vn estat. Et l'vne des plus grandes louanges que l'on donne à ce iuste Prince, c'est qu'il ne voulut iamais tirer argent de la vente des offices ou Magistrats, disant qu'il faut que celuy qui achepte en gros,

G iij

reuende puis apres en destail, & qu'on ne pourroit honnestement punir celuy qui reuend ce qu'il a achepté. Et les anciens Romains n'ont iamais riens tant craint, sinon que d'introduire aux charges publiques des personnes par ambition ou courruption d'argent. Et iusques là ont esté curieux d'oster toutes telles occasios de mal, que par la loy De ambitu on coupoit chemin à toutes sortes de fraudes & pratiques, qui s'y pouuoient commettre. Et peult-on recognoistre combié ils estimoient que cela estoit important, en ce que iamais autre loy n'a esté si souuét repetée, comme celle de l'ambitio, que nous trouuos en l'histoire Romaine auoir esté par quinze ou seize fois diuerses augmentée & rafreschie. Mais entre toutes les plus mauuaises pratiques, le moyen d'y venir par argét a tousiours esté tenu pour le plus vilain & deshonneste: voire mesme que celuy qui en estoir conuaincu, receuoir grande honte d'infamie, & de cinq ans apres n'estoit receuable pour estre faict officier public.

Et entre tous les plus grands presages que le sage Cato estimoit signifier la perte

prochaine de la Republique Romaine, cestuy-cy en estoit vn, que non par la vertu, mais par menées & pratiques & arget on obtenoit les honneurs. Et si cela estoit vray, il sembleroit certes que nous aurios de grands indices de la diminution & ruine de nostre Monarchie, puis que nous voyons apertemet qu'il n'y a autre moyé en France de paruenir aux estats & dignitez publiques, qu'auec le pris de l'argent. Chose qui est certes grandement prejudiciable, & d'où il aduient de grands malheurs en France. D'autant que plusieurs gens de bien demeurent oiseux & sans estre employez, encores qu'ils peussent estre vtiles à la chose publique, qui par leur pauureté est priuée de leurs vtiles seruices: où au contraire la Iustice est maniée en partie par quelques personnes incapables, & qui n'ont autre vertu, sinon qu'ils sont riches, & ont dequoy payer contant. Vostre Majesté sera donc treshumblement suppliée, que quassant & annullant toutes taxes & véditions d'offices, voire mesme ostant tous moyens de faueur & ambition, lors que les offices vaqueront par cy après, il luy plaise faire re-

cherche en chacune prouince de quelques ges, le sçauoir & la preud'homie desquels soit cogneuë & approuuée pour les en pourueoir gratuitement. Et parce que nous auos dit, que nous recherchios plustost le restablissement des ancienes loix, que d'en introduire de nouuelles, vostre Majesté entendra, s'il vous plaist, que le Roy sainct Loys vostre predecesseur, Prince amateur de la pieté & iustice, fist vne ordonnance", par laquelle il statua, que tous offices publics fussent conferez par election de trois personnes, qui seroit faicte par les autres officiers & citoyens des lieux: & qu'à l'vn des trois ainsi esseuz, le Roy confereroit gratuitement & sans argent ledit office vaquant. Et ceste belle ordonnance a depuis souuent esté renouuellée par les Roys Philippes le Bel, Charles le Sage, Charles septiesme, Loys onziesme, & par le seu Roy Charles neufiesme, de bonne memoire, en ses estats tenus à Orleans. De sorte que telles institutions ne sont choses nouuelles, mais de long temps pratiquées & ordonnées en France. Et de là aduiendra, oultre l'heureuse administration de la iustice, encore

57

vn autre bien à la Frace: c'est que comme l'hôneur & la gloire sont les vrais moyés pour inciter & esueiller les courages genereux, chacun s'estudiera de valoir quelque chose, lors que le seul merite & la vertu, & non l'argent, ferôt departir les honneurs. Chose qui a fait croistre l'Empire Romain en sa grandeur. Et nous esperôs encores que nous pourrons veoir nostre France florissante, lors que le seul merite, & non le pris & la faueur serôt le chemin,

pour trouuer auancement.

L'ordre des choses sembleroit requerir que nous parlissions en general de la discipline & police militaire: mais pource que cela est aliené de nostre mestier, & que l'on pourroit dire à iuste raison, que nous en parlerios comme clercs d'armes, nous n'en dirons autre chose, sinon que l'Europe, l'Asie, l'Afrique, & en general toute la terre, a prisé plus que nul autre la valeur des armes de la Noblesse Fraçoise, qui a tousiours esté en tel honneur entre tous les gens de guerre par tout le mode, qu'vn bien petit nombre de gens d'armes François, a faict redoubter les plus grandes & puissantes armées. Et qu'il n'y a

H

point de doubte qu'elle ne se puisse veoir encores en ce poinct aussi florissante & victorieuse, qu'elle sut onques, si on veut remettre sus l'ancienne discipline militaire de France. Car ce seroit mal à propos d'en chercher vne meilleure, ayat par ceste là esté saict anciennemet tat de belles entreprinses & heureuses conquestes.

Auat que passer plus auat au troissesme poinct de nostre proposition, ie suis contraint de toucher vne complaincte publique de tous les ordres de ce Royaume, qui est de ce qui est au reculement de plufieurs bons & naturels François, l'on voit les estrangiers (quand nous parlerons des estrangiers, nous n'entendons d'y comprendre les Princes) appellez aux plus grandes charges & honneurs du Royaume, soit en l'estat Ecclesiastique, Polique ou Militaire. Chose qui a esté trouuée fort iniuste, & reprouuée en toutes les seigneuries bien ordonées, lesquelles ont tousiours fai & difference entre le citoyen & l'estrangier. Et la principale marque de recognoistre l'vn d'auec l'autre, a esté, que le citoyen seul & non l'estrangier, estoit capable des honeurs & dignitez. L'exemple de cela se pourroit rechercher en toutes les Republiques, & en plusieurs se trouueroit encores, que l'estrangier a esté generalement chasse, sans pouuoir aucunemét estre receu: come en Lacedemone, & à Rome mesme par la loy Petronia, & la loy Papia, les estrangiers furent du tout bannis hors de la ville. Toutesfois ceste loy, comme dit Ciceron, fut tousiours tenue pour trop dure & seuere, & ne seroit receuable en la France, qui plus que nulle autre a esté humaine à caresser, & reueuoir toutes sortes de gens, & ne voudroit encore perdre ceste louage de douce hospitalité. Mais elle ne doit pourtant non plus que les autres, comuniquer ses Magistrats à autre, qu'à ses propres enfans.

En Athenes par la premiere institutió, l'estranger ne pouvoit estre sait citoyen, que par le suffrage de six mil personnes, & pour de grandes & importantes causes & services signalez. Et Demosthenes de son temps se plaignoit, comme d'une chose trespernitiense, que lon bailloit le droit de citoyen à personnes de bié peu de valeur, veu qu'en l'ancienne institution cela n'estoit pas accordé à eux mesmes, qui a-

uoient bien merité de la Republique. Et quant aux Romains, ils ont tousiours maintenu, tat qu'ils ont demeuré en leur entier, ceste loy si inuiolable, qu'ils ne voulurent iamais accorder le droict de citoyen mesmes aux peuples Latins, qui leur estoiet ou alliez, ou en leur obeyssance, quoy qu'ils l'ayent auecques instance, &iusques à sedition quelquesfois demandé. Et est certes memorable l'histoire racomptée par Tite Liue à ce propos. Apres la bataille des Cannes, où les Romains furent desfaicts, & perdirent la plus grand partie de leur noblesse, & principallement quatre vingts Senateurs, sur la deliberation qui fut saicte d'en créer de nouveaux en leur place, Sp. Caruin<sup>9</sup>, opina qu'il falloit introduire dans le Senat quelque nobre de gens de bié des peuples Latins, qui estoient en leur obeyssance. Mais ceste opinio fut trouuée si absurde & pernicieuse par ce grad Capitaine & Senateur Quint. Fabius Maximus, qu'il fut d'aduis de la tenir perpetuellement caché, & quelques autres Senateurs opinerent encores plus seurement & rudemet. Et tout ainsi comme les auciennes seigneuries ont estimé

que c'estoit chose indigne de faire part de leurs honneurs aux estrangiets, les modernes encores se sont beaucoup maintenus auec ceste mesme opinion. Voire que Patrice Siennois, Euesques de Gayette, qui viuoit du temps de Ferdinand le vieil & Alphonse Roys de Naples, il y a pres de cent ans, maintient en ses liures de la Republique, que ceste loy de ne communiquer leurs dignitez aux estrágiers, est vne des principales qui a conserué Venise en sa grandeur. Ie laisse les exemples des autres peuples, pour ne me rédre ennuyeux: mais ie ne puis passer sous sicence, que les loix de France, qui ont si bien pourueu à toutes choses necessaires à l'estat, n'ot encores obmis de bien & vtilement ordonner en ce point, Car en l'an 1431, du temps du Roy Charles septiesme, fut faitte vne ordonnace, par laquelle il estoit declairé, que tous estrangiers ou aubeins, estoient incapables de tenir offices ou benefices en France. Et ceste ordonnance sut pour seruir de loy irreuocable, publice en la melme annee au Parlement de Paris, seat lors à Poytiers, pour la necessité des troubles qui estoient en Frace. Et ne puis lais-

ser passer ce beau conseil que donne Philippes de Commines en son histoire tant renommée, disant que c'est chose odieuse de donner offices, benefices & grands maniemens aux estrangiers, qui ne peuuet estreiamais si propres ne si agreables, que ceux du pays. Et puis que c'est vn cosentement commun de toutes les natios, & comme vne loy de ges: vostre Majesté sera treshublemet suppliée, de pourueoir doresnauant aux charges publiques de ce Royaume, tat Ecclesiastiques, politiques, que militaires, les bons, legitimes & naturels François, qui ont & notable interest, & affection naturelle à la conseruation de la France. Ce que ne peuuent auoir les estrangiers, soubs lesquels ie ne comprens les Princes. Et nous croyons que cela fera l'vn des plus grans moyens pour reconcilier les esprits alienez & mal contens de plusieurs gens d'honneur Françoys, qui s'estiment estre mesprisez, voyant que lon prefere à eux les estrangiers paraduenture moins dignes. La tranquillité donques publique estat bien establie, toutes factions ostées, les anciennes loix remises sur, & inuiolablement obseruées,

les Magistrats non venaux, mais conferez par la vertu & merite aux bons & naturels François: nous tenons pour tout afseuré, qu'en brief nous verrons reuiure l'ancien honneur & splendeur de la France, & vostre regne aussi florissant par ceste belle reformation, comme il a esté infortuné par les malheurs & desordres passez.

Reste le troissesme & dernier poinct que nous auons proposé, qui est l'vn des principaux fondemens & comme le nerf de la Republique: c'est à sçauoir les finances. En quoy certes il s'offre tant de difficulté, que ie pense que tous les meilleurs & les plus subtils esprits de la France s'y trouuerrot confus & empeschez, principallement pour deux contrarietez qui s'y trouuent si grandes, que malaisémentelles se peuuet compatir ensemble. Car d'vne part, c'est vne chose fort estrange & fort dure à vostre peuple, qui ayme & honnore son Prince, d'entendre que vostre Majesté ait esté contrainte, pour la necessité des affaires de ce Royaume, de vendre son domaine, engager bonne partie de tous ses reuenus, & soit encores grandement endebtée. Et de l'autre aussi

nous croyos, que vous comme Roy trespiteux & debonnaire, ne pourrez entendre sans estre esmeu de grande copassion, tant d'emprumpts, d'impositions & subsides, dont vostre peuple est affligé. Et pense veritablement, que s'il estoit sidelemét representé deuant les yeux de vostre Majesté, tout ce qui a esté leué depuis quelque temps en ça par toutes les prouinces de vostre Royaume, tant par vostre commandement, que pour les frais qu'il a couenu faire en chasque pays pour se defendre & conseruer: la somme se trouuerroit si grade & excessiue, que vous auriez horreur de l'entendre, & seroit difficile à nobrer. Et qui voudroit estroittemet remedier à ce mal, il sembleroit estre necessaire d'entendre & sonder iusques au plus profond la cause & origine dont il proceede.

Nous croyos bien & sçauons certainement que les desordres & grands debtes ne sont pas venus de vostre Regne, veu que le seu Roy Charles 1x. trouua desia l'estat endebté quand il vint à la Couronne, de bien grandes sommes, à l'acquitement desquelles la Royne vostre mere auoit proietté de bons & louables desseus, 65

qui ont esté, au grand preiudice de la Frãce interrompus par les troubles suruenus du regne du Roy vostre frere, & du vostre qui peuuent auoir donné grad accroissement à ce mal, tat par les fraiz extraordinaires qu'il a conuenu faire en la guerre, que pour auoir la pluspart des sinances & receptes generales esté occupées par ceux du party cotraire. Mais aussi sçauos nous bien que beaucoup de grads Royaumes, estans outre mesure endebtez, par bon mesnaigne sont sortis de ceste misere, a-

uec le soulagement du peuple.

L'Empire Romain ne fut iamais tant apauury, qu'il se trouua apres la mort de ce monstre desbordé en tous vices Heliogabale, & toutes sois Alexandre Seuere, doux & gratieux Prince, incontinent apres sa mort rabaissa les impositions de plus de la moitié, & en quatorze ans qu'il regna, acquitta les debtes immenses de son predecesseur, & sit la guerre aux Parthes, & peuples Septentrionaulx. Et l'vn des plus grands moyens de la bonne administration de ses deniers estoit, que ceux qui manioient ses sinances, estoient si curieusement obseruez, qu'ils ne pouuoient

I

le tromper, & la peine leur demeuroit certaine, si tost qu'ils estoient descouuerts. Et le Roy Charles v. pour ses vertus surnommé le Sage, en 17. ans qu'il regna, acquitta toutes les debtes faittes par ses predecesseurs: paya grande partie de la rançon de son pere le Roy Iean, rachepta son domaine qui estoit engagé, & ne laissa pourtant de faire la guerre aux Anglois, & secourut encores plusieurs Princes ses alliez, come les Roys de Castille & d'Escosse. Et mourant, laissa vne aussi grande somme de deniers en ses coffres, qu'il s'en fut encores point veu en Frace. Et estoiet toutesfois les subsides qu'il leuoit sur son peuple fort petits & moderez de son téps. Et encores ce bon Prince en mourant, faisoit conscience de quelques aydes & subsides, dont ses subiects auoient esté foulez, pour la necessité des affaires de la France. Et pria en ses dernieres parolles son fils, de soulager son peuple le plustost qu'il pourroit, par l'abolition de tailles. Et le principal fons de ses finances, estoit l'espargne, & bonne administration.

Et à la verité il semble qu'il y a deux choses qui espuisent les deniers comuns,

sans aucun proffit ou aduantage de la Republique. Le premier est les dons imméses & non cosiderez: & l'autre est la mauuaise administration & mesnage des sinances. Vostre Majesté cossiderera, s'il luy plaist, si l'vn & l'autre ont point consommé inutilemet partie des deniers qui ont esté leuez sur le peuple. Nous ne voulons pas tellement restraindre la liberalité des Princes, qu'il ne leur soit permis de doncr à qui il leur plaist: estat cela l'yne des premieres excellences de leur grandeur & Majesté. Mais nous voulos bien dire que telles choses se doiuent faire auec moderation, & en sorte que le public n'en souffre point. Car si telles despenses sont faittes en temps que l'estat est troublé, que les finances y sont courtes, & que le peuple est trauaillé de subsides : la chose est d'autant plus d'agereuse & odieuse, pource qu'il faut accroistre les impositios pour enrichirles particuliers. Et le fisc, ou les finances publiques, comme disoit l'Empereur Adrian, est comme la ratelle en nostre corps, laquelle plus elle est grosse & enflée, & plus le reste du corps deuient sec & ethic: ainsi quand le sisce s'augmente

pour enrichir les particuliers, il fault que le commun s'en resente & s'apauurisse. Et certes en cela on ne pourroit nier, que depuis quelque temps les dons immenses n'ayent passé toutes les bornes & limites, eu esgard aux finances de France. Et nous recognoissons toutesfois cela estre aduenu par la misere du temps, où il sembloit estre dangereux de refuser aux importus qui eussent peu, prenant autre party, faire beaucoup de mal & de dommage. Et souuentesfois, pour obuier à telles choses,a esté ordonné aux Republiques, que tels dons imméles seroiét reuoquez, ou pour le moins moderez. Ces choses ne servient pas dictes pour donner loy à vostre liberalité, pour l'asseurance que vostre peuple se donne de vostre sagesse, prudence & discretion, qui sçaura mesurer sa beneficence selon ses moyens & necessitez, & clorre par cy apres plus librement la bouche à tels importuns & indiscrets demadeurs. Comme nous esperons encores qu'elle sçaura tresbié remedier au mauuais mesnage, que la calamité & necessité a introduit en l'administration de ses finances, que nous pensons proceder de deux causes principalement.

La premiere est la multitude des officiers des finances, le nombre desquels est creu si desmesurément & extraordinairement, que leurs gages, despenses, fraiz & vacations, absorbent & consommét prés de la moitié des finances de France : de forte qu'il se trouue telles prouinces, d'où l'escu apporté en vostre espargne, ne reuient pas à trente sols. Du temps du Roy Charles vi.les estats firent vne grande remonstrance & doleance, de ce qu'il y auoit cinq tresoriers, & qu'anciennement il n'y en souloit auoir que deux. Et que diroient maintenant ces bonnes gens de ce temps là, de ceste formiliere de tant de financiers inutiles, si en lieu qu'il n'y souloit auoir qu'vn recepueur general, ils en veoyent plus de quarante, comme ils sont auiourd'huy? Et pour vn tresorier de Frãce, President de la chambre des Comptes de Paris, auec quatre maistres qui estoiét prins des ancies maistres d'hostel du Roy, & fix clercs, que l'on a depuis appellez Auditeurs, ils voyent pres de deux cens officiers en ceste chambre, oultre six autres qui sont erigez aux autres Parlemés.

I iij

Desorte que lon peult dire asseurément que les gages des officiers de finance de France, se montent plus que ne faisoient anciennement tous les reuenus, subsides, & impositions qui se leuoient ordinairemét en tout le Royaume. Et pource sembleroit bien que la supression de tous ces estats faicts nouvellement en si grand nobre, & qui sont vn fardeau inutile au peuple, apres que les comptables auroient rédu compte, seroit vne des plus necessaires ordonnances que pourroit attendre ce Royaume, & qui apporteroit autant de soulagement à vostre peuple, & d'acquittemét à vos debtes. Et ne sont receuables en leurs remonstrances ceux, qui disent que ceste suppressió seroit vne diminutió des parties casuellez : car ceste commodité de toucher quelque peu de deniers coptans par hazard, s'achepte auec de grans & dommageables interests, tant pour la France que pour vos finances.

L'autre cause du mauuais mesnage, viét encores de la necessité: ayant esté vostre Majesté contrainte de prendre & emprűter les deniers à grands & excessifs interests, & faire des parties desraisonnables a-

uec quelques estrangiers & autres de vostre Royaume, qui se seruans de l'extremité en laquelle vous estes reduit, on fait entrer en leurs contracts plusieurs dons, gages, pensions, & autres parties non valables, que bien souuent ils acheptoient à grand marché, & les mettent en copte de leur iuste valeur. De façon que le gain qu'ils y ont fait auec les interests, emporte & mange plus de la moitié des impositios nouuelles, qui se leuent sur vos subiects. Et s'il aduenoit, ce que Dieu ne vueille, que telle maniere de gens eussent intelligence auec aucuns de ceux qui se messent de vos affaires: la chose seroit reduitte à tres-malheureux & mauuais termes. Car ils ne vouldroient iamais veoir vostre estat desengagé, puis que vostre pauureté seroit leur richesse. De cela ie ne diray autre chose, sino que pour semblables vsures manifestes du temps du Roy Loys x1. & Philippes le Bel, les biens de telles personnes furent publiquement confisquez. Et depuis en l'an 1 3 4 7. leur faisant leurs procés, il fut verifié, que pour deux cens quarante mil liures de principal, ils auoiét tiré de prouffit & interests plus de vingt

millions en bien peu d'années. Et nous ne faisons point de doubte, que si telles choses estoiet recherchées auiourd'huy aussi curieusement qu'elles furent lors, qu'il ne se trouuassent des sommes d'vsures bien immoderées, qui sont d'autant plus dangereuses & dignes de punition, qu'en ces vsures là les particuliers y estoient seulement endommagez, & icy le public y est interessé. Cela no° a semblé digne d'estre dit generalement pour les sinances de France, qui meriteroient vne recherche plus curieuse, & qui sera plus comodémet apposee au cayer de nos remonstrances.

Pour faire fin, nous toucherons vn mot de ce qui appartient à l'ordre & estat Ecclesiastique. En toutes les Republiques bien instituees, ceux qui ont eu la charge des choses sainctes & sacrees, ont esté tenus tousiours immunes de toutes charges publiques, tant réelles que personnelles. Et si ie voulois commécer par l'auctorité que les anciens Gaulois attribuent aux Drudes, & continuer la recherche de toutes les autres Republiques anciennes, qui ont honnoré comme Roys leurs Sacrissicateuts & maistres de leur religion & ce-

73

remonies, lon me pourroit accuser d'estre trop curieux, & paraduenture trop affectionné en ma cause. Mais ramenant les choses qui apartiennent à nostre religion seulement; le diray que dés le commencement que l'Empirea esté publiquement Chrestien, soubs la faueur de ce catholique Prince Constantin, les biens qui estoient ja sequestrez pour le service de Dieu & entretenement de sa religion, furent declairez exempts de toutes charges & priuées & publiques. Et ceste loy commencee dés le restablissement a tousiours duré ferme & inuiolable, come il se peult voir par les loix Imperiales. Et si les Empercurs Chrestiens ont acquis vne grande louange par telles immunitez données à l'Eglise de Dieu: les Roys de France pour les auoir maintenues, se sont rendus hereditaires du nom & tiltre de trefchrestien, qui leur sut concedé du temps de Charlemaigne, qui defendit si courageusement l'Eglise contre les Lombards, qui occupoient les biens qui auoient esté cosacrez à Dieu & à son Eglise. Et si nous recherchons toutes les histoires Chrestienes, nous trouucrons que plus que nuls

K

autres, les Roys de France ont esté scrupuleux, & du tout religieux en la conseruation des privileges & auctoritez de l'Eglise: & ont tousiours craint plus que nuls autres, de se seruir à leur vsage des choses lacrées & vouées à Dieu. Comme certainement par diuers exéples il a tousiours monstré, combien il auoit en horreur & detestation ceux qui ont mis les mains aux choses, qui par la pieté auoient esté reservées pour le service divin: & a tousiours vse à l'encotre d'eux d'vne iuste, manifeste & seuere vengeance. Dequoy les exemples sont assez vulgaires en l'Escrirere saincte, lesquels ie ne veulx reciter tous pour ne me rendre ennuyeux. Mais entre tels iugemens de Dieu, est memorable la defense miraculeuse qu'il fist contre Heliodorus qui auoit esté enuoyé par Seleucus Roy d'Asie, pour enleuer les choses plus precieuses consacrees à Dieu en son temple. Car estant là prest pour executer le commandement qui luy auoit esté commis, il luy apparut vn homme plein de majesté, armé d'vnes armes dorees, & monté sur un cheual bien enharnaché, lequel donna des deux pieds de

deuant dessur la teste de Heliodorus si grand coup, qu'estant ietté par terre, il sut faisi par deux ieunes hommes pleins d'vne venerable majesté, qui le foueterent de sorte, qu'ils le mirent tout en playes sanglantes, & le laisserent demy mort & esuanouy. Nous sommes contrains de ramener tels exemples pour respondre à quelques petits liurets & memoires imprimez, que queiques personnes mal affectez à l'Eglise, publient & sement par ceste Court, par lesquels ils taschent de reietter toute la foulle de vos affaires, & du desengaigement de vos debtes sur l'estat Ecclesiastique, conseillans de vendre leur domaine & reuenu temporel. Mais vostre Majesté sera, s'il luy plaist aduertie, que tels conseils procedent d'vne maligne intention, & sont semblables aux deliberations de Iulian l'Apostat, cruel ennemy du nom de I E s v s-Christ, qui ne trouuoit moyen plus propre pour ruiner la foy Chrestienne, que d'oster & rauir les biens qui estoient donnez à son Eglise. Mais la iuste punition que Dieu sist de luy, monstre assez combien son coseil estoit pernicieux. Et les exemples de la

K ii

vengeance de Dieu sur les vsurpateurs des biens de l'Eglise ne manquent point encores en la loy de l'Euangile. Car chacun sçait, que par la sentence du sainct Esprit prononcée par la bouche du sainct Pierre, Ananias & Saphira moururent soudainement, pour auoir retenu vne partie des deniers prouenans de la vente de leur heritage, qu'ils auoient donné à l'Eglise. Et s'il ne leur estoit loisible de retenir ce qui estoit procedé de leur bien : il semble bien qu'il ne soit pas iuste de prendre ce que par autruy auoit esté donné & voué au seruice de Dieu & entretenemet de son Eglise.

Celce Connestable du Roy Gontrand de Bourgongne, ayat sait son prousit des bies des Ecclesiastiques soubs l'auctorité de son maistre, sentit auat que mourir en sa conscience vn iuste sleau qui l'affligeoit interieurement. Car estant vn iour en l'Eglise, il entédit lire ces morts du Prophete Esaye: Malheur sur ceux qui adioustent maison auecques maison, possession sur possession. Et comme si ceste sentence luy eust donné vn coup de baston, il s'escria, malheureux que ie suis, ceste malediction

tombe jur moy & sur toute ma race: & iamais depuis ne proufita, ny ne fist bien, mais mourut malheureusemet. Ie n'ameneray point les exéples de Clouis 2. Roy de France, & du Comte de Mascon, recitez par nos histoires: mais ie ne puis passer soubs silence celuy de Loys sixiesme, surnommé le Gros, lequel ayant esté, pendat le cours desa vie, grand protecteur des priuileges de l'Eglise, pour certaine necessité sur les vieux jours, se voulut ayder des biens des Ecclesiastiques, desquels il leur osta la possession. Mais ce grand personnage sain& Bernard, lumiere de son siecle, l'admonnesta par diuerses lettres de la faute qu'il faisoit, & puis le vint luy mesme trouuer. Et voyant que pour ces remonstrances il ne s'en vouloit desister : le menaça fort rudement, que bié tost il sentiroit sur luy le tesmoignage de la végeãce de Dieu. Ce qui aduint soudain apres, par la mort inopinée de son fils aisné. Et si ce bo personnage viuoit auiourd'huy, de quels anathemes condemneroit & tels liures & leurs autheurs & moyes, qui conseillent de lapider & vendre tout le patrimoine de l'Eglise. Et pource que leur

K iij


principale raison & argumet de leur persuasion est la necessité de vos affaires & de l'estat: nous leur dirons que le Royaume de France s'est autresfois veu en plus grande necessité, mesmes pour les guerres intestines, estant la plus grand part de la France occupée par les rebelles & Anglois, qui ténoient entre autres la bonne ville de Paris. Et toutesfois on ne parla iamais de dissiper & mettre en vente le bien & patrimoine de l'Eglise. Et iamais la necessité ne fut plus grande en autre Royaume qu'en Ægypte en ceste grande famine, qui dura sept ans soubs le Patriarche Ioseph, pour subuenir à laquelle il fallut vendre la cinquiesme partie de tous les biens d'Ægypte, sauf toutesfois l'heritage des Prestres, ausquels Ioseph ne permit de toucher, mais les laissa immunes, comme nous lisons au Genese.

Nous ne voulons pas dire que l'Eglise en telles necessitez ne doibue ayder au public, mais cela doibt estre moderément & par les voyes legitimes: comme aussi on a veu en France, les Ecclesiastiques plus que nuls autres, prompts à subuenir aux necessitez publiques. Et encores que l'E-

glise sente soubs vostre Regne, ceste faueur de ne veoir plus son bien aliené, ce qu'elle se promet de vostre insigne pieté, si ne demeurera elle pas pourtant exempte de beaucoup de grandes charges & miseres. Car si nous voulons representer au vif, les oppressions par impositions extraordinaires & excessiues subsides elle a enduré que la desolation qui a esté en icelle, & qui continue encores en diuers lieux de ce Royaume, d'où les Ecclesiastiques sont bannis & exilez, leurs biens occupez, leurs Eglises & maisons ruinées & demolies, & culx exposez à la cruauté & rage des ennemis de Dieu & de vostre Majesté. Nous craindrions de rafreschir en ceste fin la memoire des maulx passez, & trop esmouuoir le cueur pitoyable de vostre Majesté, laquelle ne voulas attrister en ceste conclusion, nous dirons seulement, qu'oultre toutes les calamitez que vostre Majesté sçait que l'Eglise supporte, elle n'est exempte d'autres grandes charges, comme de dix huict ces mille liures qu'elle paye pour l'acquit de vos debtes, & pour les necessitez publiques en l'hostel de ville de Paris, oultre

cinquante millions dot elle a subuenu en la Republique en ses plus grands affaires. Et encores apres son naufrages où elle a perdu grande partie de ses biens, tout ce qu'elle pourra, qui sera certes bien petit, ne sera espargné au bien & vtilité publique, par moyens legitimes, raisonnables

& approuuez. L'Eglise donques, Sire, sanglante de ses playes, malheureusement deschirée; persecutée de toutes parts, se iette pour son refuge entre vos bras, vous demande ayde & conforte, vous coniure par le nom de Treschrestie que vous portez pour ceste cause, par le Baptesme que vous auez receu en icelle, par le serment que vous auez fait en vostre Sacre, de luy garder ses priuileges, & par ceste in signe pieté, de laquelle vous faictes profession & estes admirable à tout le monde, que vous soyez son suport & sa deffence. Et auec toute l'obeissance que vous pouuez attendre de vos treshumbles&tresobeyssans subiects, ils ne cesseront iamais de vous secourir des armes qui leur sont les plus propres, qui sont les prieres & oraisons: lesquelles ils feront incessamment à Dieu, qui benira & fauorisera, s'il luy plaist, toutes vot actions, pour vous rendre heureux, aimés craint & redoubté en ce monde, & vous preparera ceste troisses me & plus heureue se couronne que vous attendez en l'autrsiecle, apres ces deux qui enuironnens maintenant vostre teste. ----



A - - - - - - 17